

叢書集成續編 第二二八冊目錄

文學類



詩文別集——宋

湖山集十卷補遺一卷附錄一卷·····	宋 吳 芾撰	仙 居 一
漢濱集十六卷·····	宋 王之望撰	湖北先正 八五
雲莊集五卷附校勘記一卷·····	宋 曾 協撰	胡氏豫章 三一三
竹軒雜著六卷·····	民 胡思敬校	
魏文節遺書一卷附錄一卷·····	宋 林季仲撰	永 嘉 三八五
梁谿遺稿二卷補遺一卷附錄一卷·····	宋 魏 杞撰	四 明 四二七
東萊呂太史集四十三卷·····	民 魏頌唐輯	
	宋 尤 袤撰	常州先哲 四六七
	宋 呂祖謙撰	
	宋 呂喬年輯	續金華 四八九
文集十五卷·····	民 胡宗楫校勘	
別集十六卷·····		四九一
外集五卷·····		五七八
附錄三卷·····		六八三
拾遺一卷·····		七一九
附考異三卷·····		七四五
		七四七

宋仙居吳芾著

湖山佳集

慈航陳訓正題



欽定四庫全書總目

湖山集十卷宋吳芾撰芾字明可自號湖山居士台州仙居人紹興二年進士官至禮部侍郎歷知數郡以龍圖閣直學士致仕事蹟具宋史本傳芾爲秘書正字時以不附秦檜劾罷後金師臨江芾建言有進無退請高宗駐蹕建康以繫中原之望其領郡亦多惠政蓋非徒以文藝擅長者然其詩才甚富往往瀾翻泉湧出奇無窮雖間或失之流易要異乎蠹率類唐如輓元帥宗澤諸篇尤排募縱橫自成一格據集中自述芾生甲申歲當崇寧三年建炎初尚未及三十而筆力已挺健如此其後退閒十有餘年年幾八十乃漸趨平淡和陶諸詩當作於其時亦殊見閒適清曠之致集中寄朱元晦一詩曰夫子於此道妙處固已臻尙欲傳後學使聞所不聞顧我景慕久願見亦良勤是其末年亦頗欲附託於講學然其詩吐屬高雅究非有韻語錄之比也周必大集有芾湖山集序稱集二十五卷長短句三卷別集一卷奏議八

湖山集

仙居叢書

卷而宋史藝文志則稱湖山集四十三卷又別集一卷和陶詩三卷附錄三卷當塗小集八卷本傳又稱表奏五卷詩文三十卷所載卷目殊牴牾不合原本亡佚無從核定今據永樂大典散見各韻者採輯編訂釐爲十卷以和陶詩併入而仍取必大原序冠之史稱芾爲文豪健峻整是其雜著亦必可觀惜永樂大典中已經闕佚僅得表一首序一首附之末卷以略存其概云

原序

才氣可以任事而以學術本之未有不爲名臣者也龍圖閣直學士天台吳肅肅公以進士起家受知高廟爰及孝宗在內爲御史歷吏戶禮刑少常伯給事中又常典治內史在外則五爲帥守處劇繁以平易其才氣何待言至於履正奉公仁民愛物如嗜飲食發爲詩文身簪紱而心邱壑此則學術之力也其子嘉興太守洪衷公遺文號湖山集二十五卷長短句三卷別集一卷奏議八卷遠來謁序予與公同朝久知公熟公雖志在功名而議論專以恤民爲主復躬行之自非才氣學術兩皆有餘何以臻此當乾道庚寅公帥豫章胡忠簡公邦衡以泉守予以閩憲俱入奏事過焉燕集款其將別各爲二詞以送備載集中自是力請奉祠繼以掛冠享林下之樂者十有六年其詩詞益多意遠而辭達使人讀之蕭然有出塵之想予嘗評公侍從如嚴徐彈壓如趙張循良如龔黃止足如廣受凡西漢名臣殆可兼之然尙有一說始紹興甲子六月公以秘書省正字輪對奏江浙昔號粒米狼戾雖歉歲斗直二百今歲豐反倍之蓋由州縣重征稅監官覲美賞巡攔利掊取若蠲其算償自平矣高宗大喜七月有旨從之仁言之利其溥如此當路忌其直諒是月出倅括蒼予爲秘書少監得此事於日歷厥後上用公執法主計豈徒然哉勅局編類紹興寬卹詔令載之七十一卷之首例曰臣僚奏請當時士大夫固未知出於公今奏議復不載予故特書之以彰高宗愛民用人之美意且明儒術可富天下之大端云嘉泰三年五月日具位周必大序

湖山集

原序

仙居叢書

湖山集卷一

宋吳芾撰

和陶詩

和陶停雲

淵明抱節不渝風雨爲米折腰頗厭艱阻歸臥柴桑孤松獨撫希蹤前賢寤寐傾佇

眷茲衡宇草樹溟濛坐對五柳遙望九江亦足寄傲東軒南窗獨恨無人載酒相從

俄頃雖達不足爲榮擬攀逸軌少適真情還賞風味魂夢宵征葛巾藜杖髣髴如生

吁嗟人世如彼南柯正宜閒處養此太和縱使得意位高金多老不知止騫逃譴呵

湖山集

卷一

仙居叢書

和陶勸農韻勉吾鄉之學者

士農工商古有四民惟儒最貴但患非真誠能力學進必有因倘或中輟豈能爲人

譬如田家所仰黍稷要當早夜勤於種植惜而自安不稼不穡歲云暮矣何由足食

吾鄉人物散處川陸豈無秀民生而清穆亦既從師步趨隨逐亦既窮經訪尋歸宿

奈何人性易流難久纔及長成即求配耦稍得其資復營南畝自暴自棄有同游手

大抵名儒豈患窮賸大抵外物豈在僥冀學成道尊富貴自至不學空虛非惟自愧

雖得美官人亦見鄙若博羣書更堅素履雖處常流亦超塵軌一旦進爲必兼衆

美

和陶命子韻示津調官

我愛二龔絕勝二唐克著清節始終有光夫豈不知伊傳在商相湯泊高俱致明昌

又豈不知道否晚周天縱將聖獨有孔邱卒老於行靡憚周流胡爲潔已恥事王侯

曰豈不欲效彼羣龍潤澤萬物助成歲功潛而不用夫豈自封權將有悔不顯其蹤

喬木千尋竟困斧柯屈原特立終隕汨羅水行地中尙值坳窞縱如賈誼猶滯長沙

勿謂吾身有才有德可以安世可以益國不善用之鮮不爲忒所以古人戒之在得

湖山集

卷一

仙居叢書

我幸此生不忘本始身雖朝廷心實田里所以暮年知足知止以進爲憂以退爲喜

汝能傳家一第已及使進而爲不患無立奈何親老奉親爲急莫待異時徒然涕泣

我不望汝勸業濟時縱得入侍朝夕論思欲供子職何如在茲人能盡孝忠豈遠而

既有餘力且親燈火讀破萬卷百倍於我我恨書少意不自可汝能雪恥天亦見假

我本白丁恩及童孩雖由先德亦自書來汝誠博古爲世寶才時或未遇又何慊哉

和陶歸鳥

翩翩歸鳥投宿深林豈無所擇相彼遙岑厥有嘉樹可以託心雖逢赫日終貯清

陰

翩翩歸鳥亦已倦飛平林在望非此曷依是用歛翮一意來歸世網雖密容或我遺

翩翩歸鳥慮患徘徊四顧萬里獨有故棲故棲來返所願已諧母思廖廓擾擾此懷

翩翩歸鳥顧影蕭條亦既休息歛此風標仍遇儔匹其鳴交交營巢雖苦亦復忘勞

和陶形贈影

吁嗟汝依我自有此身時跬步不相捨皆隨我所之使汝動必正端本皆在茲念我已衰老自知死有期行且與汝別此心寧不思但我不畏死亦恥涕漣漣且把一尊酒話別汝莫疑淵明甫中書已作挽歌辭

和陶神釋

湖山集

卷一

三

仙居叢書

人生稟一氣自微而至著不問富與貧不論新與故自有形影初我便相親附二子既有言我甯無一語汝形未生時影復在何處偶與我有緣同生復同住幸我所依人造理仍知數身雖未渣然已辨周身具得酒即忘懷甯復顧毀譽醒即看雲眠目送孤鴻去我亦得安閒不憂還不懼說與二子知莫爲身外慮

和陶示周續之祖企謝景夷韻寄朱元晦

我愛朱夫子處世無戚欣淵明不可見幸哉有斯人奈何不苟合進用苦無因夫子於此道妙處固已臻尙欲俾後學使聞所不聞顧我慕慕久願見亦良勤第恨隔千里無由能卜鄰安得縮地杖一到建溪濱

和陶與殷晉安別韻送陳順之赴官

子往治畿邑趣裝亦良勤忽然來過我話別更情親顧我老且病已與死爲隣獨思陪勝侶倍覺惜清晨忍唱陽關徹與子從此分願子且少駐醉我饔飩春子雖未宦達意氣已凌雲今去天尺五騰上豈無因要無求速化切莫慮長貧抱才能

自重何患不如人

乍晴與客登眺和陶和胡西曹韻

方欣秋氣爽庭戶生涼颺俄然毛骨冷霜露侵人衣乍霽還可喜領客登翠微猶有籬下菊不見園中葵徘徊視景物似與人俱衰幸有杯中物何妨時一揮人生得行樂老去未爲遲宋玉猶未老何事苦多悲

和陶始作鎮軍參軍經曲阿韻哭陳能之

陳公行古道出處盡堪書俯仰端無負初終總一如粵從爲劇邑平步上亨衢正色主風憲彈劾靡親疎故雖頻補外直性不可紆召還方進用謂當推緒餘一朝忽擢疾力請歸故居竟化遼東鶴不作北溟魚哀哉名世士天胡賦分拘有子傳衣鉢無錢治室廬

和陶阻風於規林韻寄陳時中二首

退處固云樂未免嘆索居賴有陳使君情親如友于自應長相見豈謂各一隅我雖事廢伏閉門懶問途無日不看山無時不面湖君尤我所愛良會安得疎縱不思風度亦欲聞緒餘會須成二老君意當何如

湖山集

卷一

四

仙居叢書

人皆有往還我獨無所之若不見君子誰與同襟期嗟我已衰老無復少壯時縱使善衛養豈能長在茲願言時命駕容我親色辭我已不强酒從今君莫疑

和陶赴假江陵夜行途中韻寄江朝宗

居閑歲月久萬事心已冥獨於同調人猶未能忘情憶昔桂花發君來訪柴荆把酒坐花下歡然話平生今年秋更好花還照眼明無由共清賞幽恨已難平那聞遺積議意頗悔西征既不樂朝市卻思巖石耕古來未遇者甯免寸祿榮要當且隱忍勉強就功名

和陶己酉歲九月九日

天地氣將肅秋冬候欲交眷茲萬木落感我雙鬢凋悠然清興動與客共登高有巖號景星萬仞連雲霄一覽快心目甯辭杖履勞但恨無酒量一舉如沃焦仍恨

無坐客可繼五柳陶且拚風帽落聊醉菊花朝

和陶庚戌歲九月中於西田穫早稻

東風纔解凍農事已開端田夫競力作不獲須臾安淵明於是時亦豈容坐觀日出負未去入夜乘牛還甯不憚勞苦要得逃飢寒顧我獨何幸雖知稼穡艱逢秋但一飽此外了不干回首視淵明已是增汗顏那堪萬事拙祇得長掩關誦公穫稻旬倍爲公興嘆

和陶丙辰歲八月中於下潁田舍穫

淵明事南畝躬自穫巖隈雖復竭吾力卻得舒我懷所收既不薄卒歲事可諧鄰家相慰勞競持酒與雞留連相酬酢入夜未能迴回首往歲歉舉目俱堪哀憂心今幸釋笑口何妨開須傾瓦盆盡須放玉山頽已是從吾好甯憂與世乖任他田父哂未足爲高棲

淵明飲酒詩載田父見疑之語有曰縱橫茅簷下未足爲高棲

和陶詠貧士七首

湖山集

卷一

五 仙居叢書

士貧亦常事但視其所依苟能依於道暮景亦有輝淵明生亂世初不求奮飛爲貧聊一出違已卽言歸歸來坐衡宇無粟可療飢作詩詠貧士泰然曾不悲淵明抱歸與未老辭華軒應謂役于人豈如歸田園在家貧亦好滿眼是風烟親戚可晤語書史可精研妻子識此意相對無間言時取新酒漉一笑中聖賢我家未爲貧尙有綠綺琴手雖不能彈頗喜聞道昔時時命女奴強於絃上尋聽罷方寸適取酒時一斟顏回與原憲平日我所欽倘得從之遊雖貧亦甘心新春來未幾已見日在婁游人怕春去把酒急獻酬折花各盈把行歌滿道周貧者壁四立若不堪其憂亦復典春衣買酒呼朋儔一醉人所嗜此外非所求我愛徐孺子高名滿江干衆人皆欲仕乃獨恥爲官曾不憚辛苦負耒營一穰清節映千古至今聞者寒洪井有祠宇我常瞻其顏不覺愧汗下竟歸長掩關光景如春花身世如秋蓬淵明洞此理養拙不求工上獨思四皓下獨愛兩龔出處雖或異心跡亦略同安貧抱全節雖窮亦如通九原倘可作我欲以身從

入仕已四紀把麾還六州曾未見縣令有若淵明儔稍屈便引去高致更風流醉臥衡門下曾無寒餓憂獨抱千金璧未許人輕酬聲名傳不朽千古仰前修

和陶詠二疏韻

世人就寵榮往往麾不去日已迫桑榆馳騁方成趣誰肯急流中便作冥鴻舉屈指數哲人在昔獨疏傳萬口共稱賢饒遂塞歸路天子亦嘉之賜金示優顧淵明作此詩端欲迷者悟我觀二疏高堂無子孫慮揮金以自娛益表清節著

和陶讀山海經十三首韻送機簡堂自景星巖再住隱靜

我自歸林下亦復與世疎賴有善知識時能過吾廬伴我說道話愛我讀佛書師爲巖上去我亦爲膏車便欲展我鉢隨師同飯蔬脫我塵俗累長與巖石俱此巖固高矣卓出山海圖但比吾師高還恐巖不如我生山窟裏終朝面屏顏獨此巖未到抱恨知幾年茲遊信奇絕一覽小衆山更得師爲主二妙未易言

湖山集

卷一

六 仙居叢書

幽棲非不勝觸目是林邱若比茲巖秀培塿固難儔雲山千里見石泉四時流登臨有如此何必更他遊我年七十五木末掛斜陽縱使身未逝亦豈能久長尙冀林間住與師共末光孤雲俄暫出道俗紛蒼黃愛山端有素拘俗亦可憐昨守當塗郡不識隱靜山羨師來又去愧我復何言尙期無久住歸送我殘年師心如死灰形亦如槁木胡爲衲子歸以響答空谷顧我塵垢身擬向神河浴更願張佛燈爲我代明燭扶疏巖下樹入夏總成陰幾年荆棘地一旦爲叢林我方與衲子共聽海潮音人生多聚散離別忽驚心我與師來往歲月雖未長相看成二老風流亦異常既厭坐巖上我方爲衆糧倘師能早歸此樂猶未央

紛紛學禪者腰包競奔走才能脫葛藤癡意便自負求其道德尊如師益希有願傳上乘人永光臨濟後

吾邑多緇徒浩浩若雲海大機久已亡賴有小機在乃更與一岑純全兩無悔堂堂二老禪海內共期待

古無住持事但只傳法旨有能悟色空便可超生死庸僧味本原豈識西歸履買帖坐禪牀佛法將何恃

僧中有高僧士亦有高士我雖不為高心粗能知止師是箇中人特患不為爾何幸我與師俱是鄰家子

師本窮和尚我亦窮秀才忍窮俱已徹老肯不歸來今師雖暫別泉石莫相猜應緣聊復耳師豈有心哉

和陶挽歌詞三首

吾年七十五壽命不為促仕僅五十年出處粗可錄人生會有盡自應身就木寄

湖山集

卷一

七

仙居叢書

語親舊輩不必為我哭百年如一夢吾夢今始覺亦既了萬緣無殆亦無辱所欠惟一死得死今已足

嗟我在生日一飲數十觴有時無酒飲亦復潑醅嘗今日雖有酒羅列在我旁對之徒自嘆與世隔風光所幸埋骨地不離雲水鄉魂魄時一遊此樂猶未央

老眼日昏昏華髮日蕭蕭不死竟何待理合葬荒郊荒郊何所有四面俱岩壑榮木望秋落亦已成枯條青松為我夕白石為我朝仍幸二親墓相去無幾何今得

從之遊歡喜如還家我心既歡喜安用挽者歌有人來奠我但問山之阿

和陶桃花源

我聞桃花源其先是秦世當時避地人歲久俱已逝其後長子孫生理還不廢種桃以自營結茅以自憩有兒但發蒙初不工六藝有田但收禾了不輸二稅有雞祇晨號有犬不夜吠淵明愛其真為此成新製我久聞其風褰裳思一詣所慮路難通仍恐水難厲夢寐不能忘抱恨知幾歲所恨天見私於此施嘉惠貽我萬株

桃漫山迷眼界却勝武陵溪草樹相蒙蔽相去復不遠只在吾廬外人號小桃源景物適相契

和陶悲從弟仲德哭陳澤民

年來朋舊少大半已凋零人物如吾子共謂上青冥行年纔五十歎息負平生憶子初見我我意已先傾愛子器識遠侔子功業成縱不登要路亦必享遐齡武邑曾未久早已聞政聲方將脫選調榮養娛親庭天公亦何事於此獨無情一旦棄我去不復見儀型痛傷風月夜空對酒尊盈

此首依王杏村先生傳鈔本補入

湖山集

卷一

八

仙居叢書

湖山集卷二

宋吳芾撰

五言古詩

春雨不止魯漕有二詩因次韻

青春能幾何況已過寒食此時對東風一日亦可惜正好倒清尊呼婦莫鳴瑟胡不少自寬兀坐有憂色一春雨已多連日風更力安得補天漏坐待江月白

春日固喜雨雨多亦可已胡爲尙滂沱連日烟浪裏江湖更瀟漫不見蒲與葦有時漏日光烘雲薄如紙欲晴又復陰何以慰田里鬱鬱不能舒一坐四五起

和陳平仲中秋懷舊遊

天末逢秋半臨流翫佳月置酒延孤光夜久涼風發感時歌慷慨醉來翻不悅念人有聚散念月有圓缺萬事轉頭空百年飛鳥瞥粲從罹亂離頭角嗟垂折兀坐山谷間何人定交結素琴已塵埃孤劍尙清刮故人不可見幽懷欲誰說明月自

湖山集

卷二

仙居叢書

團團幽憂空烈烈忽得陳子詩辭旨兩奇絕歷歷叙舊遊筆端如有舌何處復相從酒壺行自揭遙想鮑與劉應亦嘆胡越要當按酒兵無令冒斧鉞吾儕豈長貧廟堂方簡拔

符倅同遊雁蕩其所和范相遊山韻

晚學愧淹博微官妨隱盤攀龍榮請事欽板喜承顏庸庸資盼睐簿領洗塵煩南豐茂人傑才望藹江關題輿神德政鎮俗念時艱仙山尋勝外妙句落人間氣連天柱壯清奪霜空寒一讀三歎息髮立誰敢謾但嗟俊逸才尙滯海之灣中興急賢哲日日聞賜環况復有如公驥足甯久閒會須早命駕即日當召還發硯觀利器斷離新海寰宣室佇前席顧問應夜闌

寄季元集

劍池有逸人過我談名理自謂出蠶塵知足更知止高標拂烟雲雅志在山水既作陶淵明且慕赤松子我方聞緒餘固已生歡喜正欲叩淵源獨恨未暇耳忽云

桐柏山此去甚密邇擬一往其間尋真訪遺址不久便可還舉此玄妙旨一去寂

無音逢人問行李人言不復來征車已西指反把遊山屐去踏長安市似聞稍留連尙稽歸故里未免傍人門乞憐應忍恥縱使得美官所喪亦多矣嗟哉人學仙如君能有幾冥鴻合高翔不謂事乃爾徒有懶窩名却入旋窩裏始知聽空言未若觀素履意者天愛君要君行處是慮或成沉迷敗道自此始聊復小撓之欲其全暮齒庶幾堅固心永無塵念起

江行阻風

我生走四方足跡亦幾遍初未識江行每起浮家羨一從登此舟舉室盡欣忭既得舍車徒且免入郵傳高枕臥短篷頓忘行役倦始謂旬日間便可朝行殿縱未許歸田行止亦可判那知事好乖一夜狂風轉怒號動地來波濤立江面如屋復如山拍天仍拍岸三日不能休雲容更千變始疑江神驕出與風伯戰擁起千里潮散作雪飛濺跬步莫能前有纜莫能牽又疑慢爾神至此獲深譴亦自料平生忠信粗表見神既依人行豈不略爲援若謂神無私應物當普現胡爲泝流船却乃去如箭而我獨滯流纖棹長江畔終日困飄飄使我頭目眩試取蘋藻羞更效橫汗薦再拜祝天公冀爲開方便莫分往與來莫出貴與賤風靜波亦平一如所願庶幾舟中人彼此兩無怨

阻風又成數語呈江朝宗

平生航浙河不知幾往返豈不或滯留有時容幸免未若此番來所向輒相反順水卽值風便風還阻阻淺夜來至奔牛一雨成飮建妻孥笑相看陡覺雙眉展謂可便及城假館少休假平明風橫生吹我船頭轉咫尺不可前安能達京輦客路固多艱我行亦太蹇何當歸去來高臥青山遠一任雨兼風杜門都不管

和何倅遊雁蕩

何侯富詞藻能賦兼能詩百篇卑李白十稔嗤左思搜奇抉靈怪造化不能私每爲山水遊錦囊隨所之雁蕩祕神秀鬼物潛司機開林發幽隱肇自興國時高巖

聳齒萃列岫森瑰奇龍湫神光異龍鼻靈液滋天柱萬仞立冰簾千丈垂羨君沿
檄來暇日遂遍窺興隨佳處發景與高情宜留步欣有得過眼光如遺乘雲躡危
磴躋險攀樛枝惟有許詢興心形不知疲我慚動拘俗薄宦方棲遲恨君爲此行
不獲相追隨平生愛山心自視如調飢尋幽倘有路初不問險夷幾欲老山間便
將雲衲披頃幸官是邑柴車日載馳列覽不暫捨游燕必於斯每欲狀奇怪苦乏
幼婦詞千崑與萬壑胸中徒自知別來歲月久况復逢艱危茲雖值時平老大無
所施今觀君所賦妙境俱在茲慨然想雲壑應不謂我欺會當尋舊遊重與同襟
期

丁亥守常塗中夏有獻瑞麥者今日池中復得雙頭蓮因成小詩以記之
嗟我百無能此身仍老矣濫此把一麾何以慰千里隴麥秀兩歧池蓮綻雙蕊斯
事雖偶然亦爲邦人喜

和許守巖桂

湖山集

卷二

三

仙居叢書

桂華燦秋杪造化氣所鍾清香通十里不與凡卉同使君雅好客攜酒臨芳叢被
花惱不微一笑高堂哄花本生月窟何事來樊籠疑是姮娥懶睡起鬢蓬鬆一枝
欲斜插誤落秋山中要須排日賞拚取百尊空莫待花零落惆悵隨西風

和任司理賞梅

平生愛梅花常有花前諸花亦知我心臭味頗相若對花輒痛飲席地天爲幕常
恐風雨摧有負東君託一從隨宦牒但知究民瘼動爲官守拘進退非綽綽僕指
三十年無復有此樂每逢春信回長憶花下酌老來把一麾亦欲強有作牒訟日
裝懷朱墨苦紛錯忽聞花已開枝頭鬧寒梅喜即領賓僚對花話離索邂逅却成
歡清談間諸謔勝賞雖未窮亦足慰寥落後夜霜月明尚可理前約

和許守水晶葡萄

珍果孰稱最靜中試旁搜白奈非時至赤梨經歲留廬山杏萬株武陵橘千頭未
若蒲萄美甘滑仍脆柔正當三伏暑滿架走青虬繁子何磊落一一如綴旒我家

得異種潔白映林丘每笑渠與粟濫比千戶侯邇來事奔走頗恨拋鉏縶持此贈
夫子因復獻鄙謀他年堆馬乳豈但供薦羞願以釀千斛永言資燕遊客來彌日
醉應不數青州

門外池內荷生雙葉

今朝池內荷一柄生雙葉傍人爲我言喜事尙重疊我老皆無用榮望久已絕偶
有二婦姪行將臨誕月所願生二孫絲絲傳世業

寄題楊宰清畏軒

古人貴慎獨舉世知者希末俗事誇耀常患不我知楊子有雅尚傳家守清規折
腰三十載不辭州縣卑猶慮與衆異憂譏還畏譏開軒揭華榜却恐非其宜要當
且用晦處靜藏天機昔賢忌獨清此語非吾欺

題碧雲亭

累土創新亭本擬還舊觀或言舊亭庑視此纔及半我方安樸拙豈敢事輪奐言
念夢幻身終日困几案既未許自如超然脫羈絆亦欲對江山時發一笑粲自從
得新亭頓覺百憂散亭前柳色新亭下荷花亂明月可坐邀積雪堪俯翫憑欄送
飛鴻千里歸一盼詩成似有神酒行欲無算取次亦足樂胡爲尙興嘆恨吾年已
衰志不在遊宦何當歸去來終老湖山畔

湖山集

卷二

四

仙居叢書

次韻沈漕使寄和碧雲亭之作

衰年厭塵勞久念作淨觀奉祠還故山閱歲更過半草草結茅廬雖無輪與奐水
作綠蘿衣山爲青玉案自足了餘生豈爲浮名絆牽從江上來去國同王粲既與
猿鶴疎還驚鷗鷺散公餘坐危亭四顧雲影亂新詩忽鼎來累日飽吟翫洗我胸
中塵宛如親清盼信知隱侯家句法有成算方今苦乏材當饋屢興歎如公人物
英雋久從遠宦會見御追風起自長淮畔

寄題鮑昌朝足軒

江南有散人幾年臥草野破甑餘塵埃衡門絕車馬倘非義所安一介不取捨聞

軒窮巷間此意非滿假雖云外不足中有至足者道義輩古人文章播天下一點浩然氣萬象資陶冶持此復何求酣歌對醅呼哉簞瓢樂千古一回也先生於此時卓然秉大雅顧我愧高風亦忝詩酒社何當登此軒抵掌共披寫

題生春亭

府治何偏仄幾不容欠伸我來撤敗屋池館爲一新便有鳥喚客更多花惱人誰知牢落地一旦遽生春

題涵碧亭

幾年涵碧亭吾亦屢來往當暑既難逃斯亭尤可賞清照心膽寒涼侵毛骨爽我方困長途且此休塵鞅

題還觀亭

城上闢新亭似若規模小誰知此亭中勝景冠江表湖山既同旋煙雲仍縹緲萬象森目前不數花與草公餘乘興來聊以散懷抱四時風物新一一發天巧芳春

湖山集

卷二

五 仙居叢書

柳色連長夏荷花繞月明固已佳雪積還更好凭欄認歸舟策杖送飛鳥適意豈在大容膝自足了第我思故山上章方告老指日是行人頗恨來不早

寄隱者

守道宋高士築室齊東鄙植竹看歲寒種田助形委束書捐古今抱易究生死不以外移內不以行責止九十留童顏湖山飽清視或顧先生云時平可以起先生本無求棄置如敝屣俄聞與物化精一未嘗毀汗簡書逸民義風洗貧士東望呈肺肝遙瀉一卮水

和陳國佐亦愛堂韻

紛紛當世士盡道休官去自墮塵網中誰能復回顧重爲軒冕惑一念遂差互要當發深省悟此形皆寓馳徒擾擾靜中有奇趣夫子廊廟材華途昔榮遇富貴方迫逐脫身一何遽蓋恐負初心或爲名所誤獨尋陶淵明三徑歸來處親朋續舊遊寢食安故步詩成月滿窗坐久塵生履個中有真樂自足慰遲暮我方困長

途因公識歸路讀公寄傲篇更覺忘世慮有如逃空虛傾耳聽韶謔念此有限身歲月空復度他時願卜築結茅相近住如公適往姿平生已深慕我雖負俗累胸中無好句偷獲從後塵登高亦能賦

夏日同官會飲白鶴寺雙瀑亭李道濟作詩紀事因次其韻

嗟予好泉石所至窮幽勝年來墮塵埃復苦炎熱盛賴有古招提相去不步何何時供燕遊庶以息喧競山僧結虛亭瀟灑淨如鏡雙瀑從天來景物更幽迴欄楯溢波光清涼殊可凭復幸僚友賢雅與山川稱得暇傾尊疊相從盡豪俊令尹如子文去就亡喜愠武邑不負丞所蓄金玉潤耿侯固坦夷趙子亦純正盍簪已足樂况復有名醴酒酣人意適坐久天宇靜踏月各言歸清風遠相趁君詩繼踵來敏捷過於瞬中復含妙理不獨寫幽興讀罷愈驚人癡坐不知暝援筆強續貂安能繼高詠

和王夷仲詠施粥

湖山集

卷二

六 仙居叢書

伊昔豈無旱赫日流金石伊昔豈無水巨浸連天白未若去歲風飄忽幾終夕時方屬新秋稻子半黃赤倏然捲地來一掃不遺力但覺田畝空不見倉箱積餘禍及吾民來春有飢色巡門粥妻子不足充貴糴往往成流離有家歸不得我方還里閭正值此艱厄有心懷拯救不寐欲通昔念無捐廩人此意空憤激民飢猶已飢吾甯忍獨食作糜倒瓶粟恨不及九百糾合族與鄰樂從有吾叔豈但一時利永作他年額要令里中人自此長飽德雖或有凶年不復更他適鄭罕與宋樂未足爲匹敵厚施報必豐會須看他日

再和

嗟我性拙疎平生好泉石好景與良辰風清并月白必對佳友朋一尊陶永夕雅志在輕肥每笑公西赤歲晚效一官粗竭區區力所得僅牛毛罪戾如山積與其鎮營營終朝有憂色孰若歸去來日作太倉糴雖然食不充野性還自得况復二老人年來多病厄杜門奉旨甘此意自平昔端欲務寬閒初非爲矯激他日會稽

歸斯言終不食人誰諒此心交遊謾千百獨幸王夫子相知如鮑叔憐我氣早衰
短髮僅覆額信我非作僞有意在作德餘生能幾何捨此將安適世路多風波談
間起仇敵且復倒壺觴樂此承平日

有感

陰陽失調變歲事成大饑我聞江湖間細民競流離瘠飢已無食卒歲還無衣民
窮聚爲盜自古誠有之不謂嚴冬日宛如暮春時里閭疫癘起災速速嬰兒今已
歲殘臘不見雪片飛中夜不能寐念此方涕洟上天復赫怒雷聲震四維驟雨相
繼作奔電仍交馳連夕不能止遠近俱憂疑我心更驚愕倍畏天之威炷香拜庭
下再三爲民祈願天正時令順行無逆施反雷變作雪盈尺以爲期庶幾宇宙內
物物各得宜

和王澧州喜雨

田父苦亢旱傷心涕泗沱使君憫斯民零露亦何多古廟舞羣巫袂屬肩相摩密
湖山集 卷二 七 仙居叢書

雲自西郊奈汝旱魃何天官感精誠霹靂加譴訶遂協畢星好一洗吾民病頓覺
田畝間歡然聲氣和人生一飽足甯復憂其他要當及豐年對酒仍高歌祗愁偃
鼠腹未醉顏已酡

和林大任上許守喜雨

退之訟風伯風伯罪固彰未若旱魃甚千里塵沙黃我欲持釜鉞尸諸古道傍此
志竟未就展轉成悲涼使君有妙術在德非馨香神龍不敢臥感通趁靈場霽然
下甘雨天地森開張旱魃不待誅一旦自摧藏

機簡堂余里人也在方外三十年來未識其面乾道己丑余帥豫章乃自圓
通來謁與之款語連日忘疲不謂末法中有此龍象且喜余里之有人因
其歸作詩以送之

我家石井旁山水非不奇所恨過從少無與同襟期獨幸里巷間高僧有二機大
機傳祖印海內聲名馳晚歸結草庵杜門人莫窺嗟哉已物化不見三十并我爲

銘其塔世猶仰清規小機真龍象方爲人天師宴坐一禪榻天花零亂飛聞名亦
二紀頗媿會面稀忽自感早來訪我江之湄共說無生話不覺日晷移顧我麋
姿久欲脫羈羈來日寧有幾擾擾將何爲一點退閒心不謂師已知祇俟及新歲
上章力丐歸師倘還故里願言款柴扉我雖無長物亦有筇一枝正欲穿林壑相
與窮幽微庶幾進此道盡洗平生非

白石道者棲於洪崑以石爲糧先朝敬愛之賜予之物甚盛一日主僧持來
郡齋因獲恭覽歎仰之餘因成拙句二首

高僧隱青山宴坐咀白日不知幾何年人猶訪遺跡顧我頑鈍姿但能知肉食回
首仰高風捫心有慚色

道人厭塵紛萬乘挽不住愧我未得歸見之愈增慕奎畫儼若新真容宛如故舊
隱雖寂寥山靈尙呵護

和黃作霖白髮

湖山集 卷二 八 仙居叢書

白髮有公道古來人盡然我初未四十霜雪已滿顛黃子我同歲比我還更賢時
命未遇合退藏非自捐不須悲晚景不須怨蒼天如君豈長貧時主方御乾

病中有感

大暑苦河魚久乃變成病輾轉床席間百藥幾盡試神氣頓索然不止形容悴自
謂與鬼隣偶然有生意方欲少開眉赤目又爲祟餘年能幾何十日不知味今雖
強支持下筋猶畏忌去歲夏到官今年又秋至默數一年中安好無一二顧此衰
病軀豈堪長代既回首望故山幸有寬閒地不如歸去來笑歌聊自慰

湖山集卷三

宋吳芾撰

五言古詩

和胡經仲中秋

平生恐晷昧虛空光陸離心與此月同不容一毫疵恨月有圓缺不得常清奇每欲語天公仍斫此桂枝青冥去無路思慮空勞疲明知此意苦慙慙長我隨去年西湖上爛醉吟悲辭今年巧相覓似欲敘離思西風爲披拂浮雲無蔽虧坐開白壺酒與月論襟期永結無情歡謝此世上兒吾友胡夫子豪蕩笑墨屎擬借月顏色爲君鑒薄帷告之且痛飲行樂當及時

和閻邱莘叟中秋翫月

平生愛明月夜坐長忘眠每見冰輪上兩足先趺躐清賞意未足常恐雲油然老來有餘興猶不減少年今歲及秋半一醉擬流連無何山雨來不見觚稜圓尙意

湖山集

卷三

仙居叢書

酒爲偷兒所竊

我性苦拙疎與世不相偶平生不如意往往十八九何以遣此懷賴有尊中酒去冬釀碧香頗不計升斗準擬與親朋興來一聚首庶幾牢落中時時開笑口偷兒何如事一夕負之走可惜數十壺化爲一鳥有昔聞韋秀才有酒盜不取今我乃致寇退省良可醜無乃造物者知我疎慵久恐我醉時狂未免自遣咎用此警昏迷意在鞭其後顧我雖無知自愛豈不厚從今誓改圖停止傳杯手炷香捧茶甌閉門清自守坐對古聖賢永作忘年友

和董伯玉不向東山久韻

讀書想前人往往得師友每愛釣渭濱頗喜耕谷口夫豈與世違甘心臥巖數升

沈自有時此意君知不

野外少過從出門欲何向所幸得夫君相與樂閑曠年來既倦遊老去那病忘且復對酒尊尙須時一訪

我暫出山去常憂蕙帳空聞君東山樂愛君古人風日暮君不來碧雲蔽高穹凌晨戒僮僕駕言將徂東

塵緣嗟未斷俗事頗相關雖懷林下趣坐失山中閑時令清夜裏夢少雲水灣寄語猿鶴伴明朝歸故山

雲氣滿戶庭嵐光入窗牖是有佳趣不出吾座右邇來獨何事未免踈踈走三讀寄佳篇臨風嗟嘆久

和王朝議韻

晚日轉雲頭長空收雨脚稍覺暑氣清獨坐傾桑落興來或醉吟接羅還倒著胸中了無憂事事俱脫略緬懷我友朋蹤蹟東西各幾欲往從之恨被微官縛此來得夫子臭味頗相若傾蓋使論心開懷不我却新詩一何工清思渺寥廓才如李杜雄句壓曹劉弱顧我志意衰筆力不如昨明時百無用正恐填溝壑公餘幸少閒對酒且深酌拭目看諸公袞袞登臺閣

和樓大防韻

嗟余本何人巖然居海嶠家世業爲農有田在巖窰春到耦妻耕寒來從母漂屋角日誅茅杖頭時荷篠迨冠知讀書聊爲起家兆有琴既無絃有劍亦無鞘僥倖廁末科安敢綴天縹但期竊斗升活此老與少豈謂暮年中亦誤蒙收召曾未著微勞遽使登華要自度老無能共知愚不肖縱未遭人非難逃天日照倘不速休官寧免淵明笑矯矯淵明賢千載誰能紹瓶粟雖無貯風標松比峭詩篇雖不多筆力天與妙顧余豈能詩微吟蚯蚓竅可笑不自量輒欲展高調武車眞豪英逸如千里驃又如禮樂器肅然在宗廟有美頌而長視容清且曠自應輔明時與國增光耀胡爲佐一州從容陪坐嘯乘興來湖山欲看余把釣濯足翫水雲縱目觀

湖山集

卷三

仙居叢書

野燒喜余和陶作舉杯爲余釀草具雖蕭疎亦復爲余嚼余已學淵明公方歧周
召出處既不侔無由遠相叫願公保令名求賢行有詔

二月晦日惜春有感

春半年已除舊聞詩人語老夫始信之倍覺傷時序方春未來時屈指朝朝數十
分擬春來欲與春爲主那知事已乖十日九風雨縱得暫時晴應酬紛萬緒舉眼
看枝頭春事已如許還憶故園花連年成間阻南園亦可人雖美非吾土願天早
放歸容我老農圖月下與風前對花歌且舞日是青春何必唱金縷春半年已除舊聞詩人語老夫始信之倍覺傷時序方春未來時屈指朝朝數十
爲有杜牧之詩也

送春有感

物物俱有情情尤鍾我輩况復病且衰白髮不相貸今日送殘春倍覺生感慨正
恐明年春此身不復在憶昔少年時逢春便傾蓋五十六年中相親復相愛春雖
自天來祇在花叢內常憂地不寬栽花容有礙買山敢論錢惟恐力不逮花開即

湖山集

卷三

三

仙居叢書

欲看花好還須戴詩必爲花吟酒必與花對醉則臥花間豈事形骸外醒復繞花
行視之過粉黛從人笑我狂我作兒童態自云盡此生與春長有會人事苦相爭
花謝春亦退我欲苦留春春去不少待爲春攪腸腸食俱忘廢悲來不可禁未
免歌慷慨我當保餘齡相見猶可再若或徑溘然遂成永分背願春略躊躇一尊
容我醉

憂居杜門久廢筆硯茲因卜築輒有所感不免破戒作數語呈諸親友

平生事幽討性與山水便晚歲關三徑頗喜得地偏遠不去桑梓近與松楸連青
山枕其後流水繞其前羣山更簇簇左右相周旋棟宇雖未立氣象已足觀旁人
笑我拙空囊無一錢何苦欲架屋作此煩惱緣我豈不自知老去將終焉居遊與
寢臥安可無數椽人生七十稀自古常有言我今七十五髭鬢已皓然縱使此身
健前去能幾年仕宦雖齟齬亦復忝蕃宣向來爲親養猶或強着鞭今既成永感
前事都棄捐倘或未死滅誓將老林泉遂此卜築志閉門日高眠栽花滿我屋種

竹環我園山上創一堂湖中具一船從容與親舊取次中聖賢雖無千鍾祿雖無
二頃田胸中富邱壑眼界飽風煙自足了一世此外休問天

再和

嗟我椎鈍姿處世百不便性獨愛山水固非嗜好偏本來山中人與青山連仕
宦三十載塵事雖滿前登臨興不減佳處輒盤旋搜奇更探勝往往窮游觀所恨
坐艱窘苦乏買山錢年來足憂患杜門絕世緣百念俱不起此心已休焉尙欲對
山水蒔次架短椽非爲求安計蓋守知足言如我百無似自視仍闕然餘生亦何
幸獲親中興年賢能隨任使熙連逢周宣退量驚鈍姿老去難加鞭有如不材木
偶未溝中捐甯復幾寒暑白骨埋黃泉且趁此身健飽食難醉眠衣葛謝軒冕杖
藜守邱園朝蹠登山屐暮上泛湖船保真師古語樂聖繼前賢有妻能力爨有兒
能力田萬事不介意過眼如雲烟無榮亦無辱庶以全吾天

久雨

湖山集

卷三

四

仙居叢書

歲旦值庚午已有旱暵憂甲申與甲子仍更雨不收豈惟主夏旱還慮麥不收農
占吁可畏使我生春愁我今安靜退身外百無求止願年穀熟高枕臥林邱時時
與親友尊酒相獻酬天意今乃爾一飽未易謀衆人憂餓死我能獨樂不念此不
成寐中夜涕泗流無所用吾力止望天賜休天不絕民命曾見大有秋

送董伯玉造朝改秩

之子久言別今秋忽此來訪我湖山上連月相追陪和詩動盈軸舉酒必盡疊使
我增眼明頓覺忘衰頹方將走山谷乘興共尋梅一笑坐花下覆此黃金杯俄然
告我去遮路挽不回勿勿陳祖席再豁懷抱開自古論治道常患無人才如子雖
寒素萬口稱賢哉時運偶未至半生困塵埃從今脫選調甯復嗟淹回會見日千
里騰躍如龍媒願言更努力聖主方築臺

丙戌送春有作

三月三十日春去人盡惜我獨惜春多欲留春不得昨憶仕行都亦屢逢春色王

事多執掌常恐無暇隙擔上看桃李負春長嘆息每欲早歸田恨不生羽翼及至
今得歸亦復少歡適平生無室廬方且事工役老妻病累年年來覺轉劇百事總
關心十日九不憚把酒對東風一春能幾夕因念夢幻軀處世不滿百今年六十
三已是桑榆迫縱使到七十能得幾年客幸春有舊好一笑常莫逆今既舍我歸
動是經年隔聊復倒離尊與春話胸臆我方葺園亭隨分足泉石準擬共東君着
此幾兩履叮嚀春早回莫使長相憶今宵已拚醉坐待東方白明日各分飛斷腸
芳草碧

和送春詩送陳澤民

少年買青春千金初不惜常恐春不留韶華難再得栽杏更栽桃爲春添景色對
酒復當歌與春亡間隙春去或未來日探春消息及至春又歸送春恨無翼追隨
九十日無日不自適胡爲把一麾千里從吏役當塗古道院事簡非繁劇宴坐對
江山亦足自怡懌所嘆之游從無與共晨夕陳侯有高標驚鳥空累百落筆動成
湖山亦集 卷三 五 仙居叢書
篇端不在促迫不意牢落中乃得此佳客人事苦參商天意有順逆笑言猶未竟
遽爾成乖隔雖未唱陽關別恨猶填臆此邦寂寥頗亦富水石方擬出郊坰共
試登山屐何事逐春歸不念人相憶春事雖已闌殘花尙紅白且復引離尊倒此
香醪碧

答客難

我治湖上園占斷山水窟幽事日相關頗覺無暇逸有客來相過云欲救我失謂
我雖愛閑未得居閑術衆人役利名公獨役景物固與衆人殊未免俱汨沒孰若
淡無營燕坐一虛室百念盡消除百事俱真率物來則應之豈可自撓撓客言非
不忠我意客未悉萬物仗境生百果因花實我聞洛陽城名園渾比迹至如司馬
公樸素世莫及有園號獨樂晚歲亦加葺人心固不同豈能盡如一顧我病日衰
行年將七十光景去不留餘齡那可必要當且逍遙樂此桑榆日寧如土木偶終
朝長兀兀况有佳山水茲焉久蟠鬱地靈盡發露一旦爲我出若不一領略無乃

太拘執何妨几席間時與相顧揖擇勝把酒杯搜奇入詩筆猶恨景物多未能盡
收拾他人視若忙我心常自佚人無所用心先望每念疾既不學羣兒詫仙仍佞
佛不有博奕乎爲之猶勝弗客既聞斯言語塞幾若訥因爲客書之聊以誌髣髴
會須畫成圖繼取王摩詰

聞同庚不幸有感

我生甲申歲同歲知幾人十中無一在使我涕隕巾常試屈指數誰登要路津不
過五六輩蹤跡半已陳其一最先達進爲國大臣寵榮無與比近亦以計聞顯我
何爲者本是隴畝民持槩已過分壽更近七旬獨恨苦拘縛歸志不得伸天復放
我歸遂此自由身湖山堪寓目風月足怡神有花共我醉有鳥助我吟若不自娛
樂開口對芳辰却恐泉下客笑我浪苦辛雖生亦何益徒負百年春

和陳天子卜居二首

夫子有直氣聲名重如山上書遭放逐去國知幾年傷弓念投林失水思潛淵但
期歸里社問舍仍求田迨茲是卜築占勝郊野間梅竹映左右溪山繞後前且欣
輪奐美碧瓦生青煙莫嘆經營苦綠簷成華顛君雖欲退處天豈容久閑會起佐
明主四海俱晏然

湖山集 卷三 六 仙居叢書

我亦初卜築止有湖與山一區未易就首尾八九年種竹已成林積水已成淵我
始得棲息守此桑麻田羨君治第敏不出數月間落成寫胸臆遙寄到我前佳句
粲珠玉妙畫梯雲煙我見爲君動喜甚如欲顛第恨隔山嶽無由相伴閑何時一
會面尊酒共陶然

湖山遺興

我在小西湖浩渺仍清曠大旱未嘗枯久雨亦不漲濯漚數千頃無欠亦無長中
有十里荷花開密相傍疑若水仙遊波間張帳旣列萬紅妝復陳千彩仗風細
月明時天香互飄蕩縱有老畫師丹青難寫像我心如死灰萬事俱廢忘獨於此
留情曾不忘一餉日日繞岸行踏破屐履幾兩無以寄幽懷誅茅聊小創開窗面湖

光納此無盡藏冀得日臨賦少效陶元亮用以償素心庶不孤雅尚每自謂生前足可供酬唱偶未脫世緣一出成牽強紅塵四十年白髮三千丈勞力復勞心時時嬰拙恙夢寐到湖邊恨無縮地杖迄今始歸休挂冠老湖上坐看水中天依然涵萬象近樹與遠山倒影還淵望驚濤兩闌飛瀑來千嶂沙頭鷗鷺集水面龜魚漾似認舊主人有意來相向時方夏初臨雨霽天風颺日影烘微雲水紋生細浪徘徊至夕陽迤邐扁舟放恍覺此身輕有如在峴園我病雖不飲亦爲傾家釀酒酣逸興來懷抱益舒暢嗟我本寒儒百種無一樣晚有田園所得已過當今更享此湖重慚逾分量是豈人之力無乃天所貺惟是頑鈍姿年衰多俗狀塵痕滿衣襟攬鏡空感愴要當盡洗濯見我本來相心跡喜雙清從人詫官况

紀夢

平生好山水至老心不移每聞有佳處欲見唯恐遲相去雖云遠不憚脚力疲縱不能得到夜夢必見之晚歲卜築地一半在翠微山水既俱勝景物還相宜旁人來觀此已自心自怡若乃夢中見則又遠過斯高山與流水到處皆嶠奇其間有樓觀金碧仍相輝幽深極險怪皆世所未窺謂必神仙窟非世所得知不謂我凡骨乃獲來游嬉恍然若驚覺有如天上歸是豈造物者不與人相違知我有雅好特以此見貽嗟我今老矣萬事都棄遺猶有山水債未能忘夢思他日或蟬蛻百態不願爲只願山海去赴我赤松期

機簡堂自隱靜歸爲萬年主訪余林下相與道舊因以述懷

吾鄉本仙窟石井尤奇特民物生其間古來蓋千億惟師與我家所居共阡陌少小初無殊長乃分儒釋術業雖不同於道俱有得師爲方外遊聲價已籍籍象教久衰微賴師振業席鑪韞與鉗鎚信有彌天力果續佛慧命作大善知識我雖登禁塗無功亦無德但有憂國心徒勞竟何益挂冠歸林下面亦無慚色知心獨有師相見笑莫逆每思共談玄傾倒此胸臆江浙還相望恨不生羽翼昨朝忽恁然得得訪泉石一見雙眼明歡喜幾折屐第念我與師彼此頭顱白世路方艱難老

湖山集

卷三

七

仙居叢書

去合休息師既歸故鄉不應復他適願言却世緣來伴我幽寂相看成二老永爲閨里式

杜子美寄贊公詩云相看二老來往亦風流

葉性之有詩紀十五之集因用來韻

人生重行樂樂事古難全有如天邊月多缺還少同有如牛女星曾合動經年今夕羣賢集定知非偶然願我老多病要路懶着鞭年年上章疏只丐早歸田賴天憐此意得遂性所便歸來小西湖湖水清且漣吾慮在其上可濯仍可沿一望興無盡十里開紅蓮風前波渺渺雨後竹娟娟到此百念滅已是卜終焉但恨乏勝侶使我心懸懸今得與公輩共上泛湖船載月娛清夜同醉壺中天雖無管絃奏雖無羅綺筵看此水與月自足中聖賢現復座上客盡如珠玉聯其間有老匠自舊稱詩仙飲散出佳句爲我寫由拳紀此一時勝付與山水傳合當風月夕更結一笑緣

家人生朝

湖山集

卷三

八

仙居叢書

相從四十年於今成二老向來苦宦游頗恨歸不早我家枕湖上髣髴如蓬島今始得歸老方喜開懷抱復值君誕辰滿目春光好幸有酒千鍾足可供傾倒要須且沈酣莫被閒愁惱我方務清虛志不在金寶亦復戒浮華意豈在花草但願享遐齡白首長相保

生朝偶成

今晨是生朝今夕是除夜年年聚親朋往往羅酒炙而我忽抱疴見酒輒避舍一滴不沾唇何事相慰藉人生能幾許今已迫衰謝病軀復如斯令人發悲詫展轉竟無眠作詩訴同社

送津兒之官麗水

憶我初仕時不敢望高位但得宰一同使可行已志實惠倫及民死亦有生氣况復著陰功子孫將不墜胡爲人憚之百計欲求避我聞事無難辭難豈爲義世路雖多艱宦途須歷試是用俾吾兒往當民社寄眷言古括州山水有奇致我尚記